

M061B: Deutung der Meßgebräuche

- 0,1 nû mac der man . als gerne eine ze wâre .
0,2 varen zuo den êwigen genâden .
0,3 same daz er volge dem gesellen .
0,4 der in verleitet zuo der helle .
0,5 der ime niemer geseit .
0,6 die rehten wârheit .
0,7 wan daz er ime vore gelîchesenet .
0,8 er wile in leiten in den tôt .
0,9 als ouch der vogelære tuot .
0,10 der machet ûz deme rîse sînen huot .
0,11 unde recket vile lîse .
0,12 den kloben vore deme rîse .
0,13 mit hærînen snûeren .
0,14 er wirbet ouch dâ michel ungevuore .
0,15 die ouch gesitzent an den kloben .
0,16 die werdent vile dicke betrogen .
0,17 er ziuhet si hin in dâ .
0,18 unde enthoubetet si iesâ .
0,19 sînen kratten er si gît .
0,20 dâ ûfe lît ein überlit .
0,21 same vert ez umbe die alle .
0,22 die betrogen werdent zuo der helle .
0,23 dô hôrte ich ouch wîlent wole sagen .
0,24 daz schol man uns niht verdagen .
0,25 man sol diu mergriezer .
0,26 vûre diu swîn niht giezen .
0,27 si niezent ir niht . daz ist wâr .
0,28 si behorgent si aber vile gar .
0,29 iht mêr hilfet .
0,30 daz man den brediget
0,31 der dâr umbe niene tuot .
0,32 wan daz er bespottet gotes wort .
0,33 der bezeichnen daz swîn .
0,34 sîn lôn . muoz . dester boeser sîn .
0,35 swer dâ sprichet daz guot .
0,36 unde diu werc niene tuot .
0,37 dem sprichet unser hêrre .
0,38 vile vreisliche sêre .

0,39 er ernellet harte .
0,40 mit sîn selbes worten
0,41 swer aber reit daz guot .
0,42 unde diu werc dâ zuo tuot .
0,43 unze an sîne jungeste stunte .
0,44 der hât alle sîne nôt überwunden .
0,45 der hât alle sîn arbeite .
0,46 wole geleitet .
0,47 er ist ouch ein vile sælic man .
0,48 daz er ie an dise werlt bequam .
0,49 nû ne mac ich vore mînen sünden .
0,50 neheine guote rede künden .
0,51 der heilige geist en wære
0,52 mîn schermære .
0,53 unde en wolte mich behüeten .
0,54 von den meintæten .
0,55 daz er mir durch sîne güete .
0,56 gæbe diemüete .
0,57 in mîn herze
0,58 wârhafte minne .
0,59 daz mîniu wort wæren
0,60 getriuwe . unde gewære .
0,61 sô möhte ich urloup haben
0,62 ze dem allerhêrsten manne .
0,63 umbe eine rede guot .
0,64 die man vile dicke vore tuot .
0,65 umbe die vile misselîche varwe .
0,66 dâ die priestere stênt garwe .
0,67 vore dem altære .
0,68 wie durft uns des wære .
0,69 daz wir daz rehte behielten . umbe die varwe .
0,70 waz si bezeichnenent sô garwe .
0,71 des ist mir kunt eteswaz .
0,72 durch die wâren minne wile ich iu sagen daz .
0,73 nû verlihe iu Krist der rîche .
0,74 daz ir ez vernemet wîslîchen .
0,75 unde nemet ez vaste in iuwarn muot .
0,76 wan diu rede wirdet vile guot .
0,77 ez trifftet an die misse eteswaz .
0,78 ir schulet ez vernemen desten baz .
0,79 ez ist umbe misse alsô gewant .
0,80 si machete unser hêre selbe der . heilant .
0,81 mit sîneme heiligen sinne .
0,82 unde machete ouch dâr inne .
0,83 sînen hêren . lîchnamen unde sîn vile heilic bluot .
0,84 von diu ist diu misse vile guot .
0,85 unde sprichet ouch durch sîn selbes munt
0,86 “swer zuo der misse kumet .

- 0,87 mit anedæhtlîchen muote .
0,88 si wirdet ime wole ze guote .”
0,89 begrîfet in des tages der tô .
0,90 diu misse hilfet ime ûzer nô .
0,91 sô wir vûre unseren lieben hêren gân .
0,92 wider des hulden wir haben getân .
0,93 er ist vile gewaltic unde vile rîche .
0,94 sô ne schulen wir niht komen hôhverticlîchen .
0,95 wan er ist an dem willen .
0,96 er wile die hôchvertigen alle vellen .
0,97 durch unser ungezûhte .
0,98 bestêt uns manic gesûhte .
0,99 wellen wir durch sînen willen .
0,100 daz unreht an uns niht stillen .
0,101 sô wirdet unser eteslîcher dar geslagen
0,102 dâ er neheinen trôst darf haben .
0,103 daz er iemer mêre .
0,104 gesehe sînen lieben hêren .
0,105 wellen wir die kristenheit begân .
0,106 sô schulen wir gedulticheit unde diemûete haben .
0,107 daz hât uns vore gebiledet .
0,108 der alwaltende got .
0,109 wie solten wir aber si begân .
0,110 wan die ez an den buochen sehent stân .
0,111 unde vile rehte sehent
0,112 wie ez quiut . an dem buoche daz vore in dâ lît .
0,113 der neheiner kêret dâr an sînen muot .
0,114 daz ime sî nûtze oder guot .
0,115 die uns ze hirte sint gegeben .
0,116 die solten kiuschlîchen leben .
0,117 ouch solten wir in volgen nâch .
0,118 der selben künste daz ist wâr .
0,119 wan die hirte .
0,120 daz sint die êwarten .
0,121 unde heizent die êwarten .
0,122 dâ von daz si diu kint bewarten .
0,123 dâ ze der toufe mit manigeme guoten segene .
0,124 die dâ zuo sint gegeben .
0,125 mit den heiligen gotes Worten .
0,126 si vertribent von uns den leiden widerwarten .
0,127 unde toufent uns mit vlîze .
0,128 unser varwe was . êr . wîze .
0,129 si heizent uns komen lûterlich .
0,130 vûre den hêren küninc .
0,131 wir wâren von unseren sünden geboren .
0,132 unser vîant . hât uns verloren .
0,133 wir wâren gote vile lieb .
0,134 unser vîant wesse unser niht .

0,135 ê daz ich vile arm man .
0,136 sô maniger sünden began .
0,137 an den selben stunten .
0,138 hêten si mich vunden .
0,139 si vârtên mîn genôte .
0,140 vruo unde spâte .
0,141 unde rieten mir . ie mêr unde mêre .
0,142 swaz sô si mohten ze übele .
0,143 mîn hêrez ölevaz .
0,144 mit eitere vulten si daz .
0,145 si guzzen dâr in . haz unde nît .
0,146 daz ist daz allerwirseste lieht .
0,147 ich en spriche ez umbe unsich alle niht .
0,148 ich bin vile dicke gevallen .
0,149 unde sint mir wole künde .
0,150 mîne verschwunden .
0,151 iedoch möhte ich geheiliget werden .
0,152 in dem salze der erde .
0,153 die priestere heizent – – .
0,154 beginnent si der rehten êwe .
0,155 sô der priester wirdet gewîhet .
0,156 sô ist er gote vile liep .
0,157 sô wile er ze wâre .
0,158 in haben ze eineme gewinnære .
0,159 sînen vile hêren amman .
0,160 wole in der si geêren kan .
0,161 ein quarter wirdet ime danne bevolhen .
0,162 er sol sehen . daz im decheinez dâr ûz werde verstolen
0,163 unde trage ze allen stunten .
0,164 daz honic in dem munde .
0,165 unde gebe in salz suoze .
0,166 sô suochent si sîne vuoze .
0,167 unde obe sich einez dicke .
0,168 von den anderen geschicke .
0,169 sô habe er des lewen muot .
0,170 unde mache ez vile wunderenguot .
0,171 unde habe ez in sîner huote .
0,172 unde ville ez mit sîner ruote .
0,173 unze ime daz ouge .
0,174 entweder naz werde .
0,175 von den trehenen . oder von dem bluote .
0,176 sô ist er sîn meister . guoter .
0,177 dâ mit sol er si alle .
0,178 bringen zuo dem stalle .
0,179 der stal . bezeichnenet die kristenheit .
0,180 wole in der dâr inne bestêt .
0,181 den er denne niht mac betwingen
0,182 noch zuo den anderen bringen .

0,183 daz muoz er gar lâzen varn .
0,184 daz kumet niemer in Abrahames barn .
0,185 daz hât sich sô gesunderet .
0,186 daz nimet der wolf durch nôt .
0,187 die misselîchen varwe .
0,188 seit iu nieman garwe .
0,189 dâ von wile ich ein teil sagen .
0,190 ob ich es urloup habe .
0,191 ez sint zwô varwe wole getân .
0,192 die der priester an im sol haben .
0,193 im ist blate geschaffen .
0,194 dâ mit zeichenet man in ze einem pfaffen .
0,195 diu blate heizet krône .
0,196 die sol er behüeten schône .
0,197 krône ist ime niht gebære .
0,198 er ne sî rihtære .
0,199 hât er priesterlîchen muot .
0,200 sô ist er rihtære guot .
0,201 daz er die lappen treit .
0,202 daz sol iu werden geseit .
0,203 diu lappe ist geschaffen .
0,204 ze manenne dem pfaffen .
0,205 diu bezeichnenet die kiuscheheit .
0,206 diu an im sol sîn .
0,207 der zungen . in sînen munde .
0,208 dannen ime diu guote rede wart kunt .
0,209 wolten wir die minnen .
0,210 in dem herzen dâr inne .
0,211 wolten wir si tragen . unde breiten .
0,212 sô mohten wir die lappen tragen .
0,213 unde mohten ez allez an uns haben .
0,214 in die kirechen sol er gân .
0,215 ze allervorderst sol er stân .
0,216 er stât ze allervorderest .
0,217 er ist unser leitære . unde unser trôst .
0,218 wan er uns sol leiten .
0,219 ûz disen arbeiten .
0,220 sô nimet er denne in sîne hant .
0,221 ze allrêrest einen kamp .
0,222 er rihtet daz sîn hâr .
0,223 ez sol ime ligen . daz ist wâr .
0,224 an daz hâr ist ez gezelt .
0,225 dâ ist ein anderz ûz erwelt .
0,226 wir schulen hinder ime stân .
0,227 vile wole berihtet er uns daz ist wâr .
0,228 mit guoter diemuote .
0,229 vore gote dem guoten .
0,230 sô heizet er ime ein wazzer bringen .

0,231 sô garwet er sich an daz singen .
0,232 als er daz wazzer entwâhet .
0,233 unde er die hende getwehet .
0,234 sô wischet . er si sâr
0,235 unde truckenet sich dâ nâch .
0,236 an daz wazzer ist ez gezelt .
0,237 ein anderez ist dâr ûz erwelt .
0,238 wir schulen hinder ime stân .
0,239 vile wole getwagen . daz ist wâr .
0,240 ûzen unde innen .
0,241 unde obe an uns sî decheiner slahte übel .
0,242 beidiu nît . unde haz .
0,243 abe uns wischen wir daz .
0,244 sô nimet er denne in sîne hant .
0,245 ein vile hêrlich gewant .
0,246 daz heizet ein humerâle .
0,247 mîn truhtîn dâhte . waz daz wære .
0,248 dâ mite kumet ime der schate . des heiligen geistes .
0,249 vile wole bedarf er des .
0,250 den leit er almitten ûf sînen houbet .
0,251 niht verrer ist ime erloubet .
0,252 daz er diu ôren dâr inne beleit .
0,253 daz sol iu werden geseit .
0,254 daz bezeichnenet daz sîniu ôren .
0,255 nehein unreht schulen hoeren .
0,256 noch sîniu ougen dar gesehen .
0,257 dâ er decheines unrehtes . bejehe .
0,258 von diu sol man den priester niht twingen .
0,259 ze unrehten dingen .
0,260 unde ne mac er ez niht gemachen . guot .
0,261 sô kêre dannen sînen muot .
0,262 daz humerâle ist vile hêre .
0,263 ez bezeichnenet noch mêre .
0,264 dâ sint ane zwêne gürtele lange .
0,265 dâ mit er sich hât umbevangen .
0,266 dâ mit knüpfet er zesamene .
0,267 die kiusche . unde die tugent .
0,268 alsô schulen wir daz umbrâle tragen .
0,269 sô sliufet er danne in ein gewant .
0,270 daz heizet albe . unde ist lanc .
0,271 unde ist genennet wîz .
0,272 unde ist geworht in allen vlîz .
0,273 ûzen und innen .
0,274 ist dechein übel dâr an getân .
0,275 daz ne sol decheine wîs dâ bestân .
0,276 diu albe . bezeichnenet den heiligen gelouben .
0,277 der geloube ist aber vile guot .
0,278 der diu guoten werc tuot .

- 0,279 der sich tages unde . nahtes .
0,280 vlîzet gotes rehtes .
0,281 der ist wole gehelmet .
0,282 vaste gehalsberget .
0,283 der mac wole mit rehte .
0,284 daz volkwîc durchveheten .
0,285 volkwîc geleisten .
0,286 wider den swarzen meister .
0,287 unde . mac âne wunden
0,288 wenden her umbe .
0,289 her widere kêren .
0,290 zuo sîneme lieben hêren .
0,291 zuo der himelischen Jerusalêm .
0,292 wie möhte uns iemer baz geschehen .
0,293 der gürtel ist alsô getân .
0,294 der sol uns alle umbevâhen .
0,295 der gürtel heizet daz reht .
0,296 sô garwet sich der gotes kneht .
0,297 minneten wir daz rehte .
0,298 wir hiezen alle gotes knehte .
0,299 diu stôle ist lanc unde breit .
0,300 diu umbe sînen hals gêt .
0,301 diu bezeichnenet noch .
0,302 sante Pêters joch .
0,303 dô er dâr in geweten was .
0,304 dô er sanc unde las .
0,305 der noch dâ inne geweten stêt .
0,306 wie sæliclîchen der vûre sich gêt .
0,307 almitten in deme . wege .
0,308 daz er uns dâ mite zeichen gebe .
0,309 nû schulen wir hüeten alle .
0,310 daz wir dewederhalbe vallen .
0,311 diu stôle rôt .
0,312 diu bezeichnenet .
0,313 den allerhêresten wîn .
0,314 der in dem keliche sol sîn
0,315 diu wîze daz brôt .
0,316 dâ mit wir alle werden geuoret .
0,317 diu casula . diu ime wole stêt .
0,318 unde in allen bevâhet .
0,319 dâ mite wirdet bezeichnenet . - . - . - .
0,320 diu ie mit gote was .
0,321 die drî tugende
0,322 haftent zesamene .
0,323 unde machent stæte .
0,324 alle des mannes guottæte .
0,325 also daz pflaster vile guot .
0,326 die steine an der mûre tuot .

0,327 sô nimet er den hantvanen .
0,328 sô ist der hêrre wole gar .
0,329 sô sint ervollet .
0,330 diu heiligen gotes wort
0,331 der hantvane bezeichnenet die gotes vart .
0,332 dâ diu helle beroubet wart .
0,333 unde er die sîne alle
0,334 lôste von der helle .
0,335 er hiez si varn zuo den êwigen genâden .
0,336 unde hiez uns nâch ime komen . dare .
0,337 ein bilede er uns vore truoc .
0,338 dâ nâch wære uns ze vorschenne guot .
0,339 sîn houbet neigte er ze wære
0,340 vore dem heiligen altære .
0,341 dâ mite kunte er uns die güete .
0,342 daz got die diemüete .
0,343 an sich nam unde gie .
0,344 dâ er daz hêre kriuze vant .
0,345 vore dem gotes tische er danne kniewet .
0,346 sîner sünden er bejihet .
0,347 sô zelt er sîne schulde .
0,348 er sprichet “hêrre lâ mich haben dîne hulde .
0,349 unde verlich mir
0,350 daz ich müeze dienen dir .
0,351 daz dû an mir müezest haben .
0,352 einen armen dienstman .
0,353 daz ich bote werde .
0,354 von dem himele zuo der erde .
0,355 unde ouch helfære sî .
0,356 aller dirre menigî .”
0,357 sô hât er urloubes gegert .
0,358 sô ist got der in gewert .
0,359 ein kirjeleis . er danne singet .
0,360 die alten . ê . er uns bringet .
0,361 als er ze dem anderen mâle singet .
0,362 die niuwen . ê . er uns bringet .
0,363 die leczen liset er danne sâr .
0,364 daz evangelium dâr nâch .
0,365 als er daz evangelium ane vâhet .
0,366 der mit unzûhten dâ stât .
0,367 dem wære ze wære alse guot .
0,368 daz er nackent viele in eine gluot .
0,369 wan daz sint gotes wort .
0,370 unde sint an uns ervollet .
0,371 “– – – .” er danne singet .
0,372 den gelouben er uns bringet .
0,373 den sol kunnen . wîp . unde man .
0,374 der ie ze rechter toufe kam .

0,375 daz er in spreche swâ er sî .
0,376 daz er dâ mite bewart sî .
0,377 ein bilede er uns denne tuot .
0,378 daz wære uns ze wizzenne guot .
0,379 daz er mit den armen gekriuzet stât .
0,380 als die juden unseren hêren tâten .
0,381 sô der hêre sprichet . “– .”
0,382 sô ne schulen wir niht entwellen mêr .
0,383 wir sulen biten starke .
0,384 umbe den gotes êwarten .
0,385 umbe die misse die er singet .
0,386 daz er si vüre müeze bringen .
0,387 daz ez gote wole gezeme .
0,388 unde uns genædiclîchen wege .
0,389 sô der hêre alsus .
0,390 singet . “– . –”
0,391 sô gewinnet er niemer mêre .
0,392 sô manigen helfære .
0,393 daz er daz getürre lân .
0,394 er ne müeze selbe daz hêre lop ane vâhen .
0,395 sô helfent ime denne .
0,396 die heilic engele .
0,397 vile gewislîchen singen .
0,398 unde daz lop vüre got bringen .
0,399 dâr nâch neiget er
0,400 vüre den altær sîn houbet .
0,401 dâ mite kûndet er uns die nôt .
0,402 daz unser hêre was an dem kriuze . tô .
0,403 unde sîn heilic geist gesegenet . unde gewîhet
0,404 von sîneme heiligen lîchnamen schiet .
0,405 sô der gotes êwarte .
0,406 sprichet lûte unde harte .
0,407 “– – – .”
0,408 sô kûndet er uns alsus .
0,409 wie ein centurio sprach .
0,410 vile lûte dô er die martere sach .
0,411 dô wurden ertbibe .
0,412 umbe alle die werlt
0,413 unde brâchen die umbehangen .
0,414 die steine zerbrâsten .
0,415 diu greber . sich ûf tâten .
0,416 dô erlasch diu liehte .
0,417 diu sunne . unde der mâne .
0,418 wurden ire schîn âne .
0,419 ez wart allez verwandelet .
0,420 durch unsers hêren Kristes tô .
0,421 ein tuoch ist schoene . unde breit .
0,422 daz wirdet ûf den altær geleit .

0,423 got gesach den man .
0,424 der daz geêren kan .
0,425 daz ist ein corporâl .
0,426 unde bezeichnenet ze wâre .
0,427 daz vile heilige gewant .
0,428 dâ man unsern hêren in want .
0,429 dô er von dem kriuze wart erhaben .
0,430 unde wart geleit zuo dem grabe .
0,431 daz man dâr ûf setzet . unde leit .
0,432 daz ist vrôuwede aller der kristenheit .
0,433 der kelich . der dâr ûfe stât .
0,434 der bezeichnenet daz gotes grap .
0,435 diu patêne .
0,436 bezeichnenet . den stein .
0,437 der dô wart geleit ûf daz grap .
0,438 dâ unser hêre inne lac .
0,439 in den kelich giuzet er den wîn .
0,440 der schol allerhêrest sîn .
0,441 daz er daz wazzer dâ zuo tuot .
0,442 daz gevrôuwet uns allen den muot .
0,443 daz got den willen habete .
0,444 daz er uns zuo ime ladete .
0,445 diu zwei werdent dâ gesegenet .
0,446 daz dritte . ist ein brôt .
0,447 daz brichet er in driu .
0,448 heilic sint si elliu .
0,449 diu zwei beheltet er sâr
0,450 vile wole daz ist wâr .
0,451 daz dritte schiuzet er in den wîn .
0,452 daz schol der hêre merôt sîn .
0,453 daz ist aber der merôt . des unser hêre gerete .
0,454 dô er mit sînen jungeren merte .
0,455 nû biten wir got den guoten .
0,456 daz er uns wole behüete .
0,457 unde sînen geist vile hêren .
0,458 daz er uns müeze lêren .
0,459 die geistlîchen bîhte . wan diu ist vile guot .
0,460 der si lûterlîchen tuot .
0,461 der sich sîner sünden beklaget .
0,462 unde der niht verdaget .
0,463 sînen êwarten .
0,464 sô heilent si harte .
0,465 obe er die buoze geleistet .
0,466 die ime sîn meister bevilhet .
0,467 sô mac er vile wole gân .
0,468 den gotes lîchnamen entwâhen .
0,469 unde wile er des niht tuon .
0,470 sô kêre dannen sînen muot .

0,471 oder er mac in alsô envâhen .
0,472 alse Judas hât getân .
0,473 daz er wirdet gestôzen .
0,474 zuo Judas genôzen .
0,475 vore deme gotes tische er danne stêt .
0,476 unze er daz – ûf hebet .
0,477 sô sprichet er iesâ .
0,478 “– – – .”
0,479 sô schulen alle die sprechen “âmên .”
0,480 die durch got dare kâmen .
0,481 der – – . ist ein gebete vile guot .
0,482 sô wole in der in ervollet .
0,483 der gerichet niemêr niht .
0,484 des ime ze leide geschihet .
0,485 alle sîne schulde .
0,486 vergît er durch gotes hulde .
0,487 der mac sæliclichen leben .
0,488 dem werdent ouch sîne schulde vergeben .
0,489 ze wære der des niene tuot .
0,490 der hât ime selben gevlouchet .
0,491 an der misse geswîget er drî stunt .
0,492 dâ mite tuot er uns kunt .
0,493 die drî tage .
0,494 die unser hêrre lac in dem grabe .
0,495 nâch dem dritten tage . erstuont er .
0,496 unde erschein sînen jungeren sâr .
0,497 in eineme gademe .
0,498 dâ si vore den juden wâren bespart .
0,499 dô sprach der heilige Krist .
0,500 “– – . mîniu kint .”
0,501 der priester sprichet noch alsô .
0,502 des schulen wir iemer wesen vrô .
0,503 sô sol einer dare gâhen .
0,504 den gotes vride envâhen .
0,505 unde sol under die anderen teilen die minne .
0,506 swâ er der niht vindet .
0,507 der scheidet vile gewisse .
0,508 dannen âne die misse .
0,509 sô ist uns vile wole geschehen .
0,510 sô sîn wir versüenet under einanderen .
0,511 sô schulen wir dâ vile gezogenlichen stân .
0,512 unze vrône segen werde getân .
0,513 sô mügen wole urloup hân .
0,514 unde vroelichen dannen gân .
0,515 sô vasten unde vîren .
0,516 als man uns gebiutet .
0,517 unsers zehenden .
0,518 unde unsers almuosenes .

- 0,519 joch des gebetes .
0,520 schulen wir vliziclichen pflegen .
0,521 dâ mite schulen wir alle komen .
0,522 zuo der himelischen Jerusalêm .
0,523 zuo den himelischen genâden .
0,524 dar helfe uns got . âmên .